

中國邊疆史志集成

西藏史志

第一部

5

全國圖書館文獻
縮微復制中心

集賢堂

光緒丙申
用寫本
漸蜀艸
舍

衛藏通志目錄

卷首 新編

御製詩文

卷一 考證 以下悉仍舊編

卷二 疆域

卷三 山川

卷四 程站

卷五 喇嘛

卷六 寺廟

卷七 番目

卷八 兵制

卷九 鎮撫

卷十 錢法

卷十一 貿易

卷十二 條例

卷十三 紀略

原一卷今分爲上中下三卷

卷十四 撫卹

原未列入門類今新編入分爲上下二卷

卷十五 部落

卷十六 經典

衛藏通志卷首

聖祖仁皇帝御製瀘定橋碑記

康熙四十年建

蜀自成都行七百餘里至建昌道屬之化林營化林所隸曰沈村曰烹壩曰子牛皆瀘河舊渡口而入打箭鑪所經之道考水經注瀘水源出曲羅而未明指何地按圖誌大渡河水卽瀘水也大渡河水源出吐番匯番境諸水至魚通河而合流入內地則瀘水所從來遠矣打箭鑪未詳所始蜀人傳漢諸葛武侯亮鑄軍器於此故名元設長河西宣慰司明因之凡藏番入貢及市茶者皆取道焉自明末蜀寇亂番人竊踞西鑪迄本朝猶

阻聲教頃者黠番肆虐戕害我明正土官侵徧河東地
罪不容追康熙三十九年各遣發師旅三路徂征四十
年春師入克之土壤千里悉入版圖鍋莊木鴉萬二千
餘戶接踵歸附西鑪之道遂通顧入鑪必經瀘水向無
橋梁巡撫能泰奏言瀘河三渡口高崖夾峙一水中流
雷犇矢激不可施舟楫行人援索懸渡險莫甚焉茲偕
提臣岳昇龍相度形勢距化林營八十餘里山址坦平
地名安樂擬卽其處仿鐵鎖橋規制建橋以便行旅朕
嘉其意詔從所請於是鳩工構造橋東西長三十一丈
一尺寬九尺施索九條索之長視橋身餘八丈而羸覆

板於上又翼以扶欄鎮以梁柱皆鎔鐵以庀事橋成凡
命使之往來郵傳之絡繹軍民商賈之車徒負戴咸得
安驅疾馳而不致病於跋涉繪圖來上深愜朕懷爰賜
橋名曰瀘定任事著勞諸臣并優詔獎敘仍申命設兵
戍守夫事無大小期於利民功無難易貴於經久今旣
肇建茲舉俾去危而就安繼自今歲時繕修協力維護
皆官斯土者責也尙承保勿壞以爲斯民貽無窮之利
是爲記

聖祖仁皇帝御製平定西藏碑文

昔者

太宗文皇帝之崇德七年班禪額爾德尼達賴喇嘛固始汗謂東土有

聖人出特遣使自人跡不至之區經讐敵之國閱數年始達盛京至今八十載同行善事俱爲施主頗極安甯後達賴喇嘛之歿第巴隱匿不奏者十有六年任意妄行拉藏滅之復興其法因而允從拉藏苦苦腦兒羣衆公同之請中間策妄阿喇蒲坦妄生事端動準噶爾之眾肆行奸詐滅壞達賴喇嘛並廢第五輩達賴之塔辱踐

班禪毀壞寺廟殺戮喇嘛名爲興法而實滅之且欲竊據圖伯特國朕以其所爲非法爰命皇子爲大將軍王又遣朕子孫等調發滿洲蒙古綠旗兵各數萬歷煙瘴之地土馬安然而至賊眾三次乘夜盜營我兵奮勇擊殺賊皆喪膽遠遯一矢不發平定西藏振興法教賜今呼必爾罕冊印封爲第六輩達賴喇嘛安置禪榻撫綏圖伯特僧俗人眾各復生業於是文武臣工咸謂王師西討歷瘴癘險遠之區曾未半載輒建殊勲實從古所未有而諸蒙古部落及圖伯特酋長亦合詞奏曰皇帝勇略神武超越往代天兵所臨邪魔掃蕩復興蒙古向

所尊奉法教坎麻藏衛等部人眾咸得拔離湯火樂土
安居如此盛德大業非臣下頌揚所能宣罄請賜御製
碑文鐫勒招地以垂永久朕以何功焉而羣眾勤請不
已爰記斯文立石西藏俾中外知達賴喇嘛等三朝恭
順之誠諸部落累世崇奉法教之意朕之此舉所以除
逆撫順綏眾興教云爾

世宗憲皇帝御製惠遠廟碑文

我國家受

天眷命撫御寰瀛光被四表莫不尊親

太宗文皇帝崇德七年班禪額爾德尼達賴喇嘛知東土
有聖人遣使通款路涉萬里時經數載始達盛京逮

世祖章皇帝時遂親至京師朝覲備蒙

恩眷後以策妄阿喇蒲坦肆惡逞奸殘蹂西藏

皇考聖祖仁皇帝特遣大師計日平定撫綏人眾各復生
業賜今呼必爾汗冊印封號安置禪榻重興黃教用以
慰番眾皈依佛法之誠並酬班禪達賴喇嘛累世恭順

之惘也朕御極以來加意護持俾安淨土因思古今之有佛教特以勸善懲惡濟人覺世爲本黃教之傳所以推廣佛經之旨也演教之地愈多則佛法之流布愈廣而番夷之嚮善者益眾西藏既有班禪額爾德尼而近邊之番夷離藏遙遠皆有皈依佛法之心因思川省打箭鑪之外有地曰噶達昔年達賴喇嘛曾駐錫於此爰相度川原創建廟宇發帑金數十萬兩遣官董司工役倣西方白賴本佛廟之圖式凡爲殿堂樓房一千餘間又爲平房四百間賜額曰惠遠丹牐輝煌器用充備置兵以衛之達賴喇嘛來登禪楊率諸徒眾成就新居諸

番耆幼踴躍欣喜使臣奏言彼土早寒自造寺以來氣候和暖深秋未凍則知茲寺之建人神胥慶山川著靈朕所以仰體

皇考厚酬達賴喇嘛累世恭順之忱且以廣布黃教宣講經典使番夷僧俗崇法慕義億萬斯年永躋仁壽之域則以佐助王化實有裨益是用紀文豐碑以昭示久遠焉

